

LAI VENDELINÉ

Che vôs n'cognâtes pe lai r'viere que tranvoiche lou sen di médi di dépaitch'ment de Béfoue, i veus vôs envèllie è lai détièuvri.

C'ment que son nom l'dit, lai Vend'line prend son embeuse tchie nôs véjins aidjoulats, en Suisse, è Vendlicouët d'vaint de paissaie lai frontiere è Rétchésy èt peus d'airrivaie è Tchetchelvant . E çhiorimont èlle retrove lai Covatte et porcheut son tch'min djainqu'â Doubs. Che vôs lu confiez in messaïdge dains enne botaiye, çoli s'ré cré bîn in envèllri que l' veut r'trovaie â long d'lai méditerranée !

Mains pô moi , lai Vendeline , c'ât d'vaint les seuv'nis de mes premieres vaicainces tchie mai grant-mére.

A tchâtemps, i aîmôs allaie borboiyie dains lai frâche âve aîvô mes meingnous. Cés qu'éfînt pus coraidgeous s'bègnînt têt entie, mains diaî, mai grant-mére m'aivait toudje dit qu'è fayait aittîndre trâs houres aiprès maindgie d'vaint d'y allaie ! In djouè, in véjin s'ât tchaimpaie dains l'âve têt d'cheute aiprès aivoi nonnaie... nos éfîns chûrs qu'è v'lait meuri ! Et peus, i ai encoué djasaiie aîvô lu d'vaint hyié



Poi-côps nos aitraippîns tiétyes poûechons que s'câlînt dôs les pieres (des guévots et peus des motelles). Nos épreuvîns d'les pare aîvô lai main, mains âchi aîvô enne foértchatte ! Aidonc c'était lou déssietché di tchait !

E y aivait brament de graibeusses è biantches paittes, l'âve était chûrement moiyoue que mit'naint poèch' qu'elles se sont évadnées. Nos en botîns cîntche obîn ché dains in sayat et peus c'tu que poyait totes les teurie sains ravoétie et peus sains s'fère pinçaie diaingnait lou djûe. Encheûte, nôs les relaitchîns po qu'elles poyeuchînt r'trovaie yot coitchotte.

Conchtrure in bairraidge aîvô des pieres et peus des baintches, voili âchi enne boène aivisâle, çoli créait des p'têtes tchouêtes d'âve. Aidonc, nos chitçhîns enne riterie de bétias aîvô des baquiats obîn des creûches d'éthâlans.

Lai Vend'line, ç'était âchi lou pairaidis des pâтчous.....Mitnaint, è yen è encoué, mains çà pouèchque, dous obîn trâs côps dains l'onnaie, nos y laitchons des trettes po qu' ès n'demoèrechînt peus toudje quouè d'poûe !

I m'réviye de ci véye pâтчou, enne cidyairatte â care des maîrmes, in capet tchu lai beusse, enne choûele sains m'linat, qu'aivait toudje enne trette, enne cârpe